

KU FAYILA TITHIRASITI 2025/2026

Tshwane, 11 Ndzati 2025. Vukorhokeri bya Xibalo bya Afrika-Dzonga (SARS) byi tsundzuxa vatshembiwa na mani na mani mayelana na nguva yo fayila ya ximfumo ya tithirasiti leyi nga ta famba ku sukela hi ti 20 Ndzati 2025 ku fikela ti 19 Sunguti 2026. Tithirasiti hinkwato ti fanele ku fayila ntlheriso wa lembe na lembe, ku katsa na leti nga hanyiki ku ya hi ikhonomi. Thirasiti yi katsiwile ehansi ka nhlamuselo ya "munhu" ku ya hi Nawu wa Xibalo xa Malinghena, nomboro 58 wa 1962, naswona yi tekiwa tanihi muhakelaxibalo. Mutshembiwa i muyimela muhakelaxibalo wa thirasiti naswona u na vutihlamuleri byo fayila ematshan'wini ya thirasiti kumbe ku thola mutivi wa swa xibalo loyi a tsarisiweke ku endla tano.

Muhakelaxibalo wa nkarhinyana i munhu wihi na wihi loyi a amukelaka malinghena kumbe loyi a vuyeriwaka hi malinghena, handle ka ya muholo. Vatshembiwa va fanele ku lemuka swilaveko swo rhumela mitlheriso ya xibalo xa nkarhinyana. Ku engetelela, vatshembiwa va tlhela va laveka ku rhumela ntlheriso wa switiviwa swa vandla ra vunharhu IT3(t) lowu kombisaka vuxokoxoko bya mitsengo leyi nyikiweke vavuyeriwa. Ntlheriso lowu wu fanele ku rhumeriwa hi ti 30 Ndzati 2025. Mayelana na vuxokoxoko hi xitalo, endzela webusayiti ya SARS.

Vatshembiwa va fanele ku rhumela mitlheriso ya vona na matsalwa mo seketela lama bohaka enkarhini wo fayila. Matsalwa lama ma katsa xitirhisiwa xa thirasiti, switatimende swa timali ta lembe, Mapapila ma Vulawuri, switshuxo/makanelwa ma tihlengelletano ta vatshembiwa na oganogiramu leyi kombisaka vun'wini lebyi vuyerisaka bya thirasiti. Ku engetelela, vavuyeriwa va thirasiti va fanele ku tivisa malinghena ya vona, ku katsa na malinghena leyi amukeriweke ku suka eka thirasiti, eka mitlheriso ya vona vini ya xibalo xa malinghena.

SARS yi endle swi olova eka vahakelaxibalo ku landzelela hi ku tirhisa ku fayila eka inthanete. Ntlheriso wa Xibalo xa Malinghena wa Munhu yena N'wini (ITR12) na Ntlheriso wa Xibalo xa Malinghena ya Tithirasiti (ITR12T) ya kumeka eka eFiling. Hi le tlhelo, xitshembisano xo endzela Senthara ya Vukorhokeri ya SARS xi nga endliwa eka webusayiti ya SARS. U komberiwa ku tsundzuka leswaku ku na swilaveko swo hlawuleka loko wo tshuka u tsakerile ku rhumela ntlheriso wa wena wa xibalo eka Senthara ya Vukorhokeri ya SARS. Vahakelaxibalo va hlohloteriwa ku langutisa eka webusayiti ya SARS mayelana na vuxokoxoko hi xitalo eka swiboho swa vona swa xibalo, ku katsa na tithirasiti, na Xibalo xa Nkarhinyana.

SARS yi teka endlelo ra nkankondzelelo eka vahakelaxibalo lava nga titsariseliki xibalo lexi faneleke, lava nga fayileku mitlheriso ya xibalo, lava nga tivisiki malinghena hi ndlela leyi lulameke, kumbe ku hakela xikweleti a vona xa xibalo. Nkavulandzelelanawu eka swiboho leswi i nandzu wa vugevenga naswona wu ta koka rinoko ra mixupulo na ntswalo.

Mayelana na vuxokoxoko hi xitalo, tihlanganise na SARSMedia@sars.gov.za.

MAKUMU